


Kan ar Pellgent



Ton savet gand an A. Mayet.



I

I

Pep trouz dre holl
A zo deut da goueza;
An avel foll
A baouez da c'houeza;
Kaer evel ar gliz mae
A gouez war vleun ar c'hae,
Jezuz 'zo diskennet:
War blouz ar c'hraou, hep fae,
Setu Hen astennet.

Ar plouz ur hreu
Ur hreu iein ha digor
D'en aùelieu,
Hemb lukan hag hemb dor.
Ag en néan dichenmet
Jézus e zou gañnet.
Kaër e ur bar é bleu
Cheta ean astennet
Ar plouz ur peur keh kreu.

II

II

Eur vamm zeder
A vir en e gavel
E gorf tener
Diouz flemm yut an avel;
Netra kaeroc'h n'eo bet,
Gwelet biskoaz er bed,
Eged ar Mabig fllamm
A weler, en e sked,
Gant ar Werc'hez, e Vamm.

Ur vam tinèr
En dalh ar hé barlen
Ha, get douster.
Dousig hi er luchen.
Nitra kaëroc'h ér bed
Ne hel ket bout guélet.
Eit er hroédur distér
Er hreu-sé luchenet
Dré é vammig tinér.

III

III

An elez c'hlan
Holl a-unan ha krenv.
Er vann, a gan
Meuleudi Mab an nenv:
Tud an uhelennou,
A red, a vandennou,
Da welet ar Mab glan
Hervez gourc'hemennou
An Elez, en o c'han.

Eled en néan
En noz-hont e ganné
Ou hañ kaëran
E'n inour de Vab-Doué.
En dud ag er mézeu
E zeuhlinas ér hreu
Dirag er hroédur glan
Revé gourheméneu
En Eled ag en néan

IV

IV

D'ar Rouaned
Eur steredenn a flamm,
Dal m'eo ganet
Ar Mabig gand e Vamm,
Hag i gant feiz ha mall
O welet kemend all
A red da glask Doue
A dec'h diouz pep hent fall,
Hag a gav o Roue.

Rouanné en doar,
E héli er steren
Deit hemb arvar,
E gav en un o fen
Er hroédur e glaskant.
En hanañet e hrant
Aveit ar Roué hemp par
Ha, get fé, é stouiant,
Er Rouanné ag en doar.

KLEMMOU AL LABOURER DIVROET

Gwerz kurunet e Bleun-Brug Keranna

I

Siouaz, petra am eus me graet,
O pellaat diouz va Bro garet?
Petra 'm eus graet, o tilezel
Va Bro hep par, va Breiz-Izel?
Eno, en eun draonienn didrous,
En eun ti kuzet er brug rous,
Eno, pell diouz dispac'h ar bed,
Tregont yloaz 'zo ganet oun bet.
Eno, kan flour ar wagenn c'hlas
Va c'henta kousk a luskellas,
Yuadadenn ar barrou-arne,
Eno, d'an noz, am dihune.
El liorz kloz, d'an hanv laouen,
Son an eostig a zelaouen,
Ha diarc'hen, er prajou gwer,
E korollen war lez ar ster.
E troad ar c'harz, d'ar miziou gor,
E kutuilhen ar bleun digor,
D'an deizioù yen, joa a gaven
O ruza war gein an aven.
Em diousskouarn hag em envor
Eo heo c'hoaz klemm moriou Arvor
Ha kleier Breiz, a-dreuz kant leo,
A zigas d'in c'hoaz o hegleo.
Mouez skiltr ar yombard, d'an eured,
Mouez kaonv ar person, er vered,
Mouez an denved, war ar peurvan,
Holl vouezioù va bro a glevan.

II

Siouaz, petra am eus me graet,
O pellaat diouz va Bro garet?
Petra 'm eus graet, o tilezel
Va Bro hep par, va Breiz-Izel?
Sioul hag abaf evel eun oan,
D'ar c'henta komz sentus e oan,
Ha va mamm d'in, war he barlenn,
Hep poan ebed, a zeskas lenn.
Ato war zao da c'houlou de,
Kevred, an tiad a bede,
Bemnoz-a-raok mont da c'hourvez,
E pedemp Doue a-nevez.
Meur a vreur, meur a c'hoar em boa,
Seul-vui a dud, seul-vui a joa,
Ha va zad d'eomp a lavare :
A vleun, en ti, morse n'eus re.
Dister e oa hor peadra,
Hor c'houezenn a roe d'eomp bara,
Ha, gant va zud, c'hoaz paotrik krenn,
En douarou e labouren.
D'an iliz ez eamp d'ar zuliou,
Ni gave eno kuzuliou
Ha komzou fur ar prezeger
Hon heulie, goudeze, d'ar ger.
Va yez a oa hini va Bro,
Yac'h e oan evel hon dero,
Gouestad e vleunie va c'halon...
Hirio, oun troet da hailhon.

III

Krena a ra va muzellou,
War va dioujod e ruih daelou,
Pa zeu, war nij, doun em spered,
Ar zotoni vras em eus graet.
Eun deiz eta, deiz a anken,
N'hen ankounac'hain birviken,
E krogas ar youl fall ennoun
Da vont e ker gand eur mignoun.
Skuiz e oan gant va labour tenn
Ha, diouz lavar eur gazetenn,
E ker, em befe deizioù herr
Ha nebeut a dra da ober.
Ar goustians, ken rust pa flemm,
Am tage gant rebechou lemm,
Ha va c'herent, ken mat ato,
Va aspede da jom ganto.
Strobinellet gant va hunvre
Da veva pelloc'h diere,
E kasen kuit diwar va zro
Mouez va Doue ha mouez va Bro.
Da zeiz ar c'himiad, eur zadorn,
Va zad paour a stardas va dorn,
Met, astennet war he gwele,
Va mamm vat dourek a ouele.
Hogen, hon daou, da galamae,
E tec'hemp, eur c'heneil ha me,
Hag ar morc'hed, gand e gizell,
A dreuze traïtour Breiz-Izel.

IV

Siouaz, petra am eus me graet,
O pellaat diou va Bro garet?
Petra 'm eus graet, o tilezel
Va Bro hep par, va Breiz-Izel?
D'al lun da noz, wardro nav eur,
E oamp e Pariz, ar ger-veur,
Hag ez aen, gant va c'hamarat,
War al linenn da labourat.
C'houtell raoulet an hent houarn
Bemdez a roge va skouarn
Hag e kaven e oa kaeroc'h
Klemvan ar wagenn war ar roc'h.
Ar marc'h du a stleje an tren
A granc'he glaou da heul poultr
Ha va zonz a rede d'an od
Ken fresk e hanal ouz va jod.
Tud a bep yez, tud a bep bro
A welen e lec'hioù war-dro,
Met, siouaz, pebez kremm etre
Lavarou Breiziz hag o re.
Divizou lik, komzou hudur
A zistaolent gant plijadur
Hag, a-wechou, da jench c'hoari,
O zeod a zaotre ar vistri.
Eur gopr mat a-walc'h, bep sadorn,
Hep mank, a leunie d'in va dorn,
Buan e teuze, rag e ker
Dibri hag eva a goust ker.